

Apeqquteqaat aallaavigalugu oqallinnissamik siunnersuut: Qanoq ililluta ilagiit sinniisoqarneq nakussassarsinnaavarput? aamma qanoq ililluta soqutigineqarnerulersissinnaavarput?

(Inatsisartunut Ilaasortaq: Anthon Frederiksen, Partii Naleraq)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Naalakkersuisut apeqquteqaat aallaavigalugu oqallinnissamut siunnersuummut nassiunneqartumut qujapput.

Inatsisartunut ilaasortaq Anthon Frederiksen (Partii Naleraq) Kalaallit Nunaanni Ilagiinni, ilagiinni sinniisoqartitsineq pillugu apeqquteqaat aallaavigalugu oqallinnissamut siunnersuummik saqqummiussaqarpoq. Siunnersuuteqartup qanoq iliorluni ilagiinni sinniisoqartitsinerup nukittunerulersinnaaneranut, qanorlu iliorluni ilagiit sulinerannut peqataasoqarnerulersinnaanera pillugu oqallittoqarnissaanik siunnersuuteqarpoq, pingaartumik sullitassanut inuusunnerusunut tunngatillugu.

Aallarniutigalugu Naalakkersuisut erseqqissassavaat Ilagiit pillugit Inatsisartut inatsisaata nr. 9. 19. maj 2010-meersup akuersissutigereerneratigut imaalersimammat ilagiit qitiusumik aqunneqarnerannik isumaginnittuusoq tassaassasoq Kalaallit Nunaata Biskopia. Tamannalu aqutugalugu Kalaallit Nunaanni Ilagiit siornamut sanilliullugu ilageeqarnermut annerusumik oqartussaanerulernissaat akuersissutigineqarpoq. Ilagiinnut sullissinerit ataasiakkaat, tassunga ilanngullugu inuusunnerusunut sullisinnissaq, ullumikkut Ilagiinnit nammineq isumagineqarput, tak. Ilagiit pillugit inatsimmi § 6. Tassalu Kalaallit Nunaata Biskopia Ilagiinnik qitiusumik akisussaasuvoq, ilagiinnilu provstinut, palasinut, ajoqinut ilagiinnilu sinniisunut nakkutiginnittuulluni.

Inatsisit naapertorlugit ilagiinni sinniisut ilaasortanik toqqarneqartunik inuttaqarput, taakkualu nuna tamakkerlugu 250-it missaanniipput. Ilagiinni sinniisut akisussaaffigisaanni suliassarpassuit assigiinningsut ilaapput Ilagiit pillugit Inatsimmi tamakkerlutik ilanngunneqarsimanngitsut, akerlianilli Iliveqarfiit, iliveqarfiit ilusaat, avatangiisii il.il. kiisalu palasinik atorfinitsitsisoqartillugu il. il. Ilagiit Sinniisuisa peqataatittarnerat pillugit immikkut inatsiseqartitsinikkut erseqqissaavigineqarlutik.

Ilagiit sinniisuisa sulinerat sakkortuumik aqunnissaa anguniagaanngilaq, tassami najukkami pisariaqartitat soqutigisallu naatsorsuutigineqarsinnaasariaqarmata. Ilagiilli pillugit Inatsimmi § 22 malillugu evangeliup ajoqersuutiginerani ajunngitsumik atugassaqartitsinissaq ilagiit sinniisuisa pingaarnermik suliassaraat. Ilagiillu sinniisuisa suliassaannut ilaapput oqaluffinnik toqusullu inaannik sananissamut, aaqqissornissaannut, aserfallatsaaliornissaannut pinnersarnissaannullu kiisalu init naalagiararfittut atorneqartut (atuarfiit naalagiararfutisut) aaqqissornissaannut pinnersarnissaannullu siunnersuutit palasimut atuagarsuarnik allattuisuusumut saqqummiuttassallugit.

Ilagiit sinniisuisa namminneerlutik suliniutigisaannut assersuutissatut taaneqarsinnaasunut ilaapput søndags-skolertitsisarnerit, biibilimik atuartitsinerit, tusarnaartitsinerit, ilinniartunut sammisassaqartitsinerit, siuner-tanut immikkut ittunut katersuiniartitsinerit, siuner-tanut ajunngitsunut suleqataanerit, inunnik tikeraartitsini-artarnerit il.il.

Aaqqissuussinerit siuliini taaneqartut ingerlannissaat pillugit aamma ilagiit sinniisui aalajangiisartuupput.

Ilagiit sinniisuisa ulluinnarni pisussaaffiisa ilagaat naalagiarnerni aalajangersimasuni piffissaq naalagiarfissaq tamannalu palasimut atuagarsuarnik allattuisumut nalunaarutigalugu, tussiutit nutaat tapiisalu akuerisaasut atulersinnerat, apersortinnerup ullussaa allallu apersortinnermut tunngasut palaseqarfimmi palasip atuagarsuarnik allattuisup inassuteqarneratigut.

Ilagiit sinniisuisa Ilagiit pillugit Inatsit naapertorlugu suleriaasissartik nammineq suliarisussaavaat, taamaalilitullu aamma akisussaaffiit inatsimmi aamma inatsisitigut immikkut ittutigut taaneqartut qanoq isillugit suliarinissaannut piareersaasussaallutik.

Ilagiit pillugit Inatsit taamaalilluni ilagiit sinniisuisa sulinissaannut, ilagiillu ajunngitsumik ingerlanissaannut sunniteqaqataanissaannut aalajangersakkanik ajunngitsunik pingaarutilinnillu peqareerpoq. Aalajangersakkat massakut atorneqarneq ajortut, ilagiinnillu massakutut isikkulimmik kissaateqarnermut attuumassutilimmik - matumani suliniutit sammisassallu ilagiit sinniisuinit suliarineqartut.

Matumanilu ilagiit sinniisuisa sulineranni evangeliup ajoqersuutiginnissaanut pitsaasumik atugassarititaasut pillugit Ilagiit pillugit Inatsimmi § 22 immikkut pineqarpoq. Biskopi tamatumunnga paasinnilluni ukiuni pingasuni kingullerni aningaasanik immikkoortitsisarsimavoq, tamakkulu aqqissuussinernut ilagiinnut iluaqu-taasinnaasunut ilagiit sinniisuinit qinnutigineqarsinnaapput.

Ilagiit pillugit Inatsit 2010-mi atuutilerpoq, 2013-imilu allannguuteqartinneqarsimalluni. Nutaanik periarfissaqalernera ilagiit sinniisuinit sungiunniagassaammat aamma pissusissamisuuginnarpoq.

2017-imi ilagiit sinniisuinut qinerseqqittoqartussaavoq. Qinersinissaq sioqqullugu Biskopeqarfiup palasit suleqatigalugit nuna tamakkerlugu paasititsiniaasernerit takussaanerulersittariaqarpai, tamannami aqqutigalugu soqutiginnittut tamarmik paasinnilluarlutik sulineranut peqataasinnaaniassammata paasillugulu tamanna pi-massuseq malillugu akissarsiaqarnanilu pissarsiffissatut suliaammat, tamannalu aqqutigalugu ilagiit tamarmi-ullutik sulilluarnerat takutillugu.

Naggasiutigalugu erseqqissartariaqarpoq Kalaallit Nunaanni Naalackersuisut angalasarnerminnut atatillugu takusimagamikku ilagiit sinniisuisa sulinerat qanoq pingaaruteqartigisoq, ilagiillu sinniisuisa sulinermikkut ajunnginnerpaamik atugassaartitaanissaat soorunami tapersorsorparput.

Taakkunanga oqaaseqaateqareerluta oqaluffik ilagiinnilu sinniisoqarneq pillugu oqallilluartoqarnissaa qilanaaraarput.